

巢经巢全集

第五
册

播雅卷第四

遵義鄭 珍子尹編輯

遵義唐樹義子方校訂

羅鹿遊兆姓一百首

兆姓字鹿遊康熙間遵義歲貢父以忠湖北黃岡人明進士官永平府知府鼎革後從永明王至黔後隱居遵義南之龍坪時陳枚庵晦迹掌臺山鹿遊因從之遊無書不窺根底磅礴負經濟思用於世卒不合飽經亂離才益橫放常客諸侯間意偶有拂即使酒罵坐聲振杯盤雖王公大人當前弗顧也客滇時狎一妓主人豪貴者強奪去一日與宴大賓滿堂酒酣奮髯抵几指主人曰灌夫謂程不識不植一錢吾乃今見之時王聖甫在座莫逆交也爲婉調罷席明日與聖甫水調歌頭拂袖而行詩有明日悔覆瓿北上問石諸集沈雄鬱挫揮灑自如當其興會

飄發廟杜陵之壁壘笑崆峒之客氣若使旗鼓中原與朱王數子上下
馳騁未知誰拔趙幟遵義詩人之冠冕也爲文雄峭樸雅不規規前人
詞亦入蘇辛之室康熙壬午七月卒年六十餘子黃雲字大田康熙丁
酉舉人官江西吉水知縣繼宰峽江因事罷歸李知山題鹿遊集云筆
頭獨走江山氣海內誰登庾鮑堂贈大田歸里云爲問風流誰得似菊
松三徑蔣元卿並實錄也

雜怨二首

栽樹不求鳥積水不求魚各自有家國何故與郎居
天愁人不管人愁卻問天郎是儂之天作郎亦可憐
紅豆號相思萱草云忘憂二木合并生是儂與郎不

古怨曲

大海有蛟龍市有明珠簪賤妾好顏色富貴有黃金

錢賤謠

三十月黑出門望十五月圓抱頭眠月圓不圓月在天

猛虎行

骨吟肉語令我母將父令我母將父汗血今滴何處土解一衝風刷戶令我母將

母令我母將母母食兒淚兒食乳解二告我父母母生我弟母生我弟弟幼不堪

攜入市解三來日不短今日其短母戀彼天彼天云遠解四

詠史三首

鮑叔難屬國但能知管仲碌碌安平侯一言爲折衷楚尉封金來諒非金可動
邱嫂轅釜時糠覈同一痛精神猶楚越况彼醢雞甕所以青雲人高居閱世夢
文章故德韓行人故仇楚赤松遊旣乖鴟夸肉亦腐舍身博一快所志良已苦
而彼掉闔流草草爲出處不見陽春花飄忽急暮雨

王猛薄黿子張賓阻牛兒際會終無所隱淪達宿期只此六合中杖策將何之

可憐邯鄲婦廝養爲畫眉千古隆中客四顧良苦悲

卽事擬古三首

苦乎生道旁黃鳥謠其顛丹實不克薦自非好惡偏金橘采洞庭玉盃錯珠筵
搖落與克腹同不駐華年立身觀所擇嘆息霜風前

朝權誇寒松立身各有時光華在目前待雪亦何遲天心不計物爾自守根株
君行燕山北妾送太河湄握手爲君言努力當盛時高鳳不可笱所貴爲男兒
如妾一婦人僅乃事容儀芳華詎可久憎悅惟君施君其深自省淚下非別離

仲冬二日夜坐

寒月與顏色清夜斷延眺凄苦無月時衆心迸微照更深轉涼烈星光浮欲掉
深居免微風窗下一鐙耀黠鼠探入靜出爪憑屋竅蠹童擁草眠局促如山峭
蒼茫無與同寂寞鬼神召何當振崖壑聞黑奔長嘯

清平徐吏才幹可喜於其生日漫言祝之

蕭何不作相亦非刀筆流當其抱牘時安知骨可侯英雄塵埃中軒輊隨人眸
負懷在天地時至事莫由我觀汝才具一時無與儔若逢隆準公肯令汝閒休
摩挲算銅狄倒指今世秋努力愛韶華陸沈非所憂榮名事不朽勿爲身食謀
區區浮邱伯何足傲浮漚

綦江卽事

播兒一擔鹽剝去雙肩肉何爲不自愛重杖遭官扑血塗街石鮮身顛足難縮
老隸擁銀鑪如虎曳僵鹿高傳縣尉言口供書在牘明日牒堂官生死只反覆
主人笑相迎牌頭應榜腹幸可緩商量白酒聊汝速指點客囊中低語應以目
老隸出門去主人聽客哭

早度葛鏡橋

曉影蕩空濛馬蹙長虹背不知幾千尺水聲春玉碎我欲縱豪吟恐驚蛟龍睡
辰溪苦雨

急雨亂沙鷗舟人速我渡單衣水潑寒羸馬風吹住野菊不知愁獨照寒江路
桐梓道中

流雲奔天天路長鳳凰禿翼飛蹒蹒不辭水擊三千里今日飄零大道旁炎風
一何虐撲地吹塵聚眉顰溪水一何清行人汗滴與溪平目眩腰拳僵絕壁以
手捫天坐且立相如忼慨漫題橋陶侃從容猶運甓君子慎宴安小人懷飢寒
君不見播兒雙肩紅肉裂笑擔鹽簍上前山

對酒有述

山雲低合榴花重雨送清風過客夢一杯冷淡發酡顏突兀杯中起狂瀾探奇
昨與腐仙遇女子操椎祖龍懼升沈千載舊山河丈夫忼慨自來多活東閣閣
奈爾何

午困放歌

田夫醉酒拌汗漿醉伸赤腳枕袴褶夢喚小兒奔牛場山妻大叫熟黃梁起來

籬笆挂夕陽又手長匙攬泥香我生何爲共蠹僵長年齷齪縫嫁裳匡羅壓手
手辭忙竟夜北斗走雙睚借令持秉上明光責重身輕神已荒扣角者誰真周
章白日驅牛怨夜郎

走筆戲呈陳明府乞薦人哲

才子談生飛健筆石破天驚鬼神泣誤著儒冠三十一常愁不得飽飯喫明府
今之陳豫州網羅片羽無遺收肯使鵷鵠頓滄洲神鰲反脫珊瑚鉤爲報談生
豁雙眸早晚置爾元龍百尺高樓最上頭

定番州署夜飲贈州牧賈敘

當代偉人誰第一長沙太傅無與匹神寒骨重氣高超大貝天球與赤刀雅量
儼如謝安石廟堂坐運無聲色其才又勝劉道和五官並用復吟哦博聞強記
楊遵彥古事今詞皆貫穿酒酣慷慨發雄談龍門百尺瀉驚湍屈指名豪盡知
己所思藥亭賢太史贈言隻手挽天輪非夸非妄非徒云吁嗟人間萬事多舛

左天公無語但暝臥驚立天閑驥服磨鳴鵠飽腹鳳凰餓公何爲乎此安坐我
皇神聖思大風版築猶將入夢中早晚來徵黃次公平生有志吐洪鐘速令四
海歌康功

馬斃逆旅歌

車前無八騶不得稱丈夫胯下只一馬搖鞭未忍下珍惜如身復如友驕嘶時
伴青萍吼豆香芻細水清甘斟酌停勻與上口豈知一旦忽垂頭郭璞無計鞭
林猴衣以桐棺楚莊愁老烏如鬼嘯荒邱在昔退之驥劣弱寅徵其吉宜虎攫
我今豈亦望遷除造化何爲巧相奪昨日纔聞梁藥翁長揖將軍乞繡紅東坡
老人真薄倖卻把春孃換青驄我今買得雙夷女鉤輅格磔語馬語若將此輩
易驂騑只恐蹇驢惜不與從此不用悲髀肉安坐蓬茅亦是福他時選鶴學凌
空穆滿八駿難追逐馬乎馬乎死亦足

夜抵資陽

大日如斗落馬尾餓鴟無巢號敗葦鞭投燈影度城隅主人詫問人耶鬼我語
主人莫相驚籃輿後面來官人蒸壺不辭倉卒客腸空正轉如車輪答言官長
難休息書生底事走昏黑我聞此語笑還悲鐙前有酒吞不得

牛車行

曳犁牛莫怨曳車牛莫辭巨鼻回兒鼓刀笑豐胡入酪酒三卮有鬼無靈將訴
誰班班雀望城落縣令騎出鈴閣紛紛盡逐牛車來馬擁牛奔塵埋角相公卻
勅城門尉不許馬行混牛隊縣令下馬執鞭唱啞掉頭急走馬汗沒髀錦水東
風吹鮮紅一團柳絮攢金鞭火急還衙報妻子從今飲水對皇天

夢先母

曉風吹雨泥連霧母欲辭家何處去兒前牽衣母斷腸爲言去去不得住母哭
出門兒哭出夢雲黑天低江入甕江水漸漸帶血流猶聞母哭在船頭

舟次嘉定

內江嘉州山盡好畢竟嘉州天下少大江豪氣入山谷怪石伏從柔指繞三千
美人舞鏡中素妝淡掠雲鬟小東風持贈夜飛蟬青青吹出王孫草飛燕輕纖
神自腴文君放誕姿猶姣豈比內江清淺流止照寒郊與瘦島側擁峨眉雪千
尺對面桃花裂層壁花開不落雪長寒白袷紅衫左右立壁鏤古佛石槎枒紫
金光散赤城霞雅水橫來濯佛足龍鼉吐日曬袈裟此景誠然天下無歐岑何
福坐分符香山有老想像不得見誤道三郎曾此過乘輿三郎驢蹶暫留蜀何
不扁舟聊寓目應爲峨眉似玉環老淚已枯難更哭我經三度泛滄浪擬就丹
峯築草堂手把仲閏詩一冊高吟痛飲細平章官學嘉隆老相國一拳文曲過
掄揚

采蕨篇

采蕨采蕨十指流血血流指未枯腹枵氣將絕山靈露骨不忍呵猛虎憐人低
縮舌朝采采暮來歸一擔枯根擎入戶餓眼無光喚聲微河頭洗污泥甕中澄

黑水薄粉流雲合小團濃羹撥雪攪長七大婦中男併手作倉皇一碗纔到甯
我觀廩穀藁猶懸市上斗米值一錢何爲徒自苦早作夜難眠老翁吞聲告廩
穀安敢食官帖久開徵穀賤難索值昨與老妻相計較只恐嬌兒留不得天容
殘命活須臾豈惜區區間氣力老翁勿再言使我心劇悲當日聶夷中解寫鉏
禾詩甯知密箐叢山裏汗滴土乾未把犁傳聞聖人下南甸快活春隨堯舜願
山東豫蠲明歲租江南一句二百萬六龍敢望踏荒烟賜租蒙恩已一年惟正
所需難驟免節儉有餘方議蠲此諭令人感且泣兵宜效死官宜虔民口奪食
爲爾食那能坐飽負皇天獨不見夜郎忍飢采蕨人官租未納難下咽

放歌呈陳明府

對酒君莫愁我歌方欲放歲月無情自奔忙丈夫有懷當激壯如公已遇且牢
騷看我飄零是何况誤著儒冠已廿年窮愁未挂眉梢上心原不作溫飽謀面
豈得有飢寒相逢時則駕否且休天賜閒身幸無恙公真不愧古太邱飲水三

年反遭謗從來拙官不時宜我輩此心自難喪官拙不須悲極巧將何望獨不見高平男子意氣長一朝失足無依傍前路茫茫信步行不須一一細籌量只合安心住醉鄉來今過去總遺忘公如不飲日已斜明日之日如斯狀公再酌我還歌老龍起舞裂金波便叱龍行爲前導同公直駕凌風舸叶蓬山萬丈頃刻至麻姑瑤女共經過留華之爵重進酒丹陵之瓜醒顏酡下看浮蟻正婆娑

陽奇道中

荒草連天雲連地一望平蕪三百里野水散漫不成渠灌入草根秋不死古人爲國食爲先猶思斥鹵化桑田如此膏腴將萬頃何爲拋擲埋空烟若作隄陂收且濬隨水所注爲平曲便使三分畝之餘一尺猶能灌一斛昔行蜀道入荒蕪塘屯曾畫進呈書旁觀當事本異局自應哆口唾迂儒經術原以經世務介甫非爲生財誤卻令肉食取言財持籌但許私家富瀉水著地不圓方人間何事得周詳不如留作烟雨景一供游人望渺茫

江陵望遠慨然有作

蜀山西注蜀江東
吭引襄樊南北通
勢走三吳奔鶻羽
氣開七澤敵蛟宮
天設雄邦爲巨宰
萬古血骨堆穹窿
劉家名盛貴公子
守此欲作富家翁
阿瞞入許力猶薄
肯勤王事易爲功
景升實卽豚犬耳
安論劉琮么麀蟲
南陽匹夫始得志
幸使小喬悲失雄
纔有立錫留織席
敢便遙彎射北弓
掉頭向峽却入囊
白衣已照江花紅
師由襄樊倘置守
豈無一人代髯公
貧家撐理筋力盡
此局偶爾忘補空
可憐江波衝急雨
怒聲猶似說呂蒙
當彼之時應已悔
何勞長舌疲冬烘
事後論人原鹵莽
古人卻肯受磨礪
男兒蹇拙已三十
對此歷落氣如虹
駐馬城南一搔首
江影橫天愁北風

襄陽曲

江風寒客衣單
襄陽城中去住難
江烟直流霞濕
誰遣飛光當戶入
深杯淺貯琥珀濃
行人立馬緩嘶風
琵琶細撥新翻曲
留住寒雲不許東
髮絲淬水磨絨

索剪碎鶯聲移小閣鳳凰亭畔望蘭船帆影齊向羅衫落酒軟更闌笑語遲衣
香漸撲燭光罷明月來入幃珠簾總不知天雞叫煖衾綿薄又拂螺尖起畫眉
行路難

天愁地嘯日月不照夢打蝴蝶飛絃撥鳳凰叫不知妾夢旁午時幾許風雨催
長道酒暖黃金四座寬此中容易駐雙丸過客何妨暫停驂聽我一歌行路難

銅雀臺

漳河曲曲瀉平沙魏武移澆銅雀花花下焚香著朱履一朝分賣實堪嗟兒女
銷盡英雄骨遺言朔望望陵哭生作疑冢七十餘知爾西陵何處居老而讀書
同伯業可惜伊周不中法畢生辛苦爲誰忙懽娛極處儘悲涼龍泉欲吼飛光
絕不到今時已斷腸

贈營將金淵謀

黔南猛將顏如鐵短鬚環眼面凸凹釋胄從容樽酒間腐儒舉盞不得咽酒酣

匹練舞空寒一座天斜俱縮鼻叶當時張李殺戮遍天涯得公數人直驅滅滿
眼風塵尙干戈階草莫使閒雕齧

送萬進翁往滇

羅施一掌地衆山爭劈砮英靈不逐山石空萬卷書中宅仙宅仙人豪宕氣橫
天玉骸束湊青花蓮渴吸生州如酪之雲泉吐作采鳳五色鳴花箋胡乃遊戲
居人間坐使寒氈羸馬轡輅八九年秋風一日揚春水昆波搖曳鍛翎起欲將
富貴傾城寰持向遙天驕故里小子白眼高窮骨桃溪細雨種仙福翻從遠別
快初逢刹那悲歡如轉轂糞灰捧塤看去瀾星河明滅半塵蕪結璘鬱儀不同
地脈脈人間何以娛有口不可吁有淚不可驅穀城取石尋松日不周徑待相
遊乎

鐵爐歌

吳娥細齒月纖纖開脣一喚得青錢背錢入門擲在地炙肉開樽團頭醉他鄉

賤士徒搔首城東往來空兩手空兩手曳短裾不走街心走城隅行道遲遲耳
邊嘈嘈磨牙噴聲動我魂魄側身低望高牆連連紅爐數十揚火煨天衆鬼飛
灰淬焦面百死爭完銅一片方圓輕重較毫釐眼孔一一摩挲遍摩挲遍竟何
益劉家百萬供一擲化爲泥土倒街頭市兒得之轉啾唧錢乎錢乎何不長在
爐中央羣王性命相扶將

贈里人蘇開陽

亭亭山北樹移作山南春別自有鄉朋山北之木誰復親吾家楚黃轉蜀播及
吾生從蜀長大髻年作客混方言不能爲飲况爲些春遊汗漫逐南雲尾瑣依
人得共君笑我楚籍渾難信悲君楚音不可聞主人沆爽世無有夜夜明河傾
白酒飲君一斗捋君鬚君醉欲狂遶屋走吾兄久客渺無方萬里驚逢大道旁
十日相看忍便別與君翻得月連牀丈夫終不如是止憑仗君歸告吾里錦衣
白晝祇尋常會見雲揚與風起